

# Turstiar frå Eikesdalsvegen i Øvre Vats.

Kjør om lag 2,6 km frå Knapphus mot Ølen til du kjem til vegkryss der det står skilt til Eikesdal til venstre. Her står også TURSTI-skilt . Følg denne vegen om lag 700 m til du kjem til ei bru. Her finn du ein skilta parkeringsplass og info.tavle og skilt til mange ulike turar. Dette er felles utgangspunkt til mange fine turar som alle startar på god traktorveg.

Traktorvegen herifrå er stengd for alminneleg biltrafikk, men svært fin å gå på.

**Start** – 700 m oppe på Eikesdalsvegen.

**Parkeringsplass:** Ja – god parkering – hos grunneigar Per Døvik m.fl.

## Tur til Thorsgruva:

**Lengde:** Omlag 850 m å gå. Svært fin utsikt over Vatsbygda frå gruva.

**Tidsbruk:** 10 – 15 min. ved vanleg gange.

**Vanskegrad:** Blå tur – kort familietur på merka skogsveg opp.

**Terreng:** Gjengrodd traktorveg med gras. Litt bratt siste del av vegen.

**Opplysn.** Følg traktorvegen 200 m langs elva til ei grind/gjerdeklyvar og ta av til

høgre like etter grinda/gjerdeklyvaren. Følg skilt og merkepinnar

**Thorsgruva** – ei open daggruve som vart driven frå 1894 – 1914.

Grunnleggaren var Mauritz Kartevoll (1833 – 1922) frå Sandnes.

Fann thorium – eit urananholdig mineral som vart send ut i Europa til vitskaplege læresenter for vidare forskning.

**Sjå informasjon om gruva på info.tavle som står oppe i gruva.**

**Fottøy:** Vanlege sko.

## Tur til Dyrhaug: (280 m o.h.)

**Lengde:** 1,5 km

**Tidsbruk:** 30 min

**Vanskegrad:** Blå tur – fin familietur.

**Terreng:** God traktorveg opp. Ta av ved skilt ”Dyrhaug” og ”Rasteplass” på høgre side av vegen.

**Opplysn:** Traktorvegen har enkelte bratte strekningar.

Vegen snor seg oppover lia gjennom parti med gran- og bjørkeskog.

Dersom du har lyst, kan du ta av ved skiltet ”STI GJENNOM LERKESKOG”

- ein opplevelsestur – følg merkinga - stien munnar ut på traktorvegen litt lenger

oppe. Det er eigen atmosfære i slik tett skog – mjukt underlag, stilt og fredeleg.

Ved skiltet ”DYRHAUG” går du gjennom ei grind. Her ligg ei privathytte til høgre.

Like ovanfor hytta er det laga til ein rasteplass med eit steinbord. Flott utsikt over

Vatsbygda og fjella rundt. Vel verdt å ta denne turen.

Herifrå kan du ta turar vidare til Ørnaberget og Stemmetjørna eller følgja traktor-

vegen vidare til Veldehytta og så på merka sti vidare til Vikestølen, Eikås/Bjoa,

Vikebygd eller til Longåsdaalen/Bjordal.

**Fottøy:** Vanlege sko, men gode tette sko om du vil gå vidare.

## Tur til Veldehytta (350 m o.h.)

**Lengde:** 3,5 km.

**Tidsbruk:** Omlag 1 time

**Vanskegrad:** Blå tur – fin familietur.

**Terreng:** Traktorveg med nokre bratte parti.

**Opplysn.:** Følg traktorvegen heilt fram. Om lag 800m opp frå start kan du ta ein avstikkar og gå på ”**Sti gjennom lerkeskog**” og koma inn på traktorvegen litt lenger oppe.

Dette er ein fin opplevelsestur i tett lerkeskog – mjukt underlag av barnåler.

Når du kjem til Dyrhaug, (her står skilt) kan du ta ein liten avstikkar til høgre - 50 m opp ligg ei privathytte – og like ovanfor denne ligg ein flott rasteplass med fin utsikt over Vatsbygda. Ta fram nistepakken her og nyt utsikten før du går vidare. Det kan vera godt med ei kvild etter kneikane oppover.

Vegen vidare er mykje lettare å gå. Om lag 600 m oppover kjem du til eit skilt ”**REVABÅS**” og 50 m opp til høgre ligg denne gamle fangstfella for rev - murt inn i ura. **Sjå informasjon om revebåsfella på eiga info.tavle her.**

Ta ein kikk på denne før du går vidare innover til Veldehytta.

**Veldehytta** er alltid open. Her kan du nyta nista di inne eller ute . Ute er det ein grillplass. På bordet inne i hytta ligg ei hyttebok du kan skriva deg inn i.

Ved Veldehytta er det godt skilta til nye turmål om du vil. Sjå skilt og merking til Morgonsvatnet, Vikestølen, Eikås/Bjoa, Vikebygd, Longåsdalen/Bjordal.

**Fottøy:** Vanlege sko, men skal du vidare, må du ha gode tette sko.

## Tur til Vikestølen.

**Lengde:** Omlag 6 km.

**Tidsbruk:** 2 - 2,5 t

**Vanskegrad:** Blå tur – familietur. Litt tungt på myrane frå Veldehytta.

**Terreng:** God traktorveg til Veldehytta. Derifrå er det nokså flatt, men myrlendt og vått.

Må ha gode vasstette fjellsko eller støvlar på denne turen.

**Opplysn.:** Det går traktorveg heilt fram til Veldehytta. Vegen har enkelte bratte parti opp til

Dyrhaug. Her står skilt opp til **Dyrhaug** med rasteplass berre 100 m opp. Her ligg ei privathytte, men like ovanfor ligg rasteplassen med flott utsikt over Vatsbygda og fjella rundt. Du blir overraska over den fine utsikta her.

Etter ein liten pause går du vidare på traktorvegen. 600 m lenger opp kjem du til eit gjerde- der står skilt ”**REVABÅS**”. Denne ligg berre 50 m opp til høgre frå veggen.

Revabås er ei gamal fangstfelle som reven vart fanga i. Denne er murt inn i ura godt kamuflert for reven. **Sjå informasjon om fangstfella på eiga info.tavle.**

Gå vidare inn til Veldehytta der du tar ein liten pause og skriv deg inn i hytteboka.

Her står det skilting vidare til Vikestølen. Nå kan du følga merkepinnane i flatt myrlendt landskap heilt fram til Vikestølshytta. Hytta er open og hytteboka ligg klar inne i stova. Her kan du nyta niste pakken inne eller ute på gode ”hagebord”.

Kvart år sidan 1900 er det ”**Vikestølsstevne**” – eit misjonsstevne fyrste søndag i juli som sokneråda i Bjoa, Vikebygd, Vats , Skjold og Ølen har ansvar for.

Då kjem det alltid folk frå desse bygdene til sosialt samver med song, tale m.m.

Dersom du vil, kan du herifrå gå tilbake same vegen til Øvre Vats eller du kan gå vidare til Eikås på middelsgod traktorveg . Frå Eikås går det bilveg til Bjoa slik at du kan bli henta der etter avtale.

Frå Vikestølen kan du også ta ein god traktorveg til Vikebygd – då kjem du ned på hovudvegen like ovanfor kyrkja. Sjå skilt og merking og følg desse.

**Fottøy:** Gode tette sko.

## Tur til Morgonsvatnet (460 m o.h.).

**Lengde:** 5 km.

**Tidsbruk:** 1,5 - 2 t.

**Vanskegrad:** Blå tur – familietur. Litt kupert og myrlendt frå Veldehytta.

**Terreng:** God traktorveg 3,5 km opp til Veldehytta. Herifrå litt kupert og litt fuktig.  
Bør ha tette fjellsko.

**Opplysn.:** Det går god traktorveg heilt opp til Veldehytta. Nokre parti er litt bratte opp til Dyrhaug. Her står det skilt til høgre opp til Dyrhaug og rasteplass. Her bør du ta ein avstikkar på 100 m og nyta utsiktsplassen like ovanfor privathytta som ligg her. Flott utsikt utover Vatsbygda og fjella omkring. Gå vidare omlag 600 m på vegen - då finn du skiltet ”REVABÅS”. Denne gamle fangstfella ligg murt i ei steinrøys berre 50 m frå vegen. Verdt å sjå denne. Sjå informasjon om denne fangstfella på eiga info.tavle ved revabåsen. Vel framme i Veldehytta som alltid er open, kan du nyta nista di og skriva deg inn i hytteboka før du går vidare inn til Morgonsvatnet via Brenneskårdalen. Inne ved Morgonsvatnet kan du finna roen og freden og sjå fisken vaka og høyra ravnens som har sin eigen song sirklar oppe i lufta åleine eller saman med andre. Følg skilt og merkepinnar innover i ro og mak - bruk sansane og sjå deg om.

**Fottøy:** Gode tette sko

## Tur til Longåsdalen/Bjordal.

**Lengde:** 10 km

**Tidsbruk:** 3,5 - 4 t

**Vanskegrad:** Blå tur – ein lang familietur.

**Terreng:** God traktorveg 3,5 km til Veldehytta med nokre bratte parti. Frå Veldehytta og oppover på skrå til Samuelsvarden er stien godt merka og rydda. Herifrå er det lett å gå bort til Husafjellet der det er malt raude merke på berg og steinar. Vidare går stien nedover rundt Husafjellet og ned mot Longåsdalen gjennom bjørkeskog og mot Vassnuten, men du tar av til høgre ned til Logåsdalsvatnet. Her ned kjem du inn på traktorveg som går langs vatnet heilt ned til Bjordal.

**Opplysn.:** God traktorveg opp til Veldehytta. Ved Dyrhaug bør du ta ein liten avstikkar til høgre ved skilta Rasteplass og Dyrhaug” og gå gjennom grinda - like ovanfor hytta som ligg her, er det flott utsikt over Vatsdalen. Få att pusten her før du går vidare innover vegen som nå er lett å gå heilt fram til Veldehytta. Vil du ta ein stopp til, så vil du sjå skilt om Revabås litt lenger oppe – dette er ei fangstfelle. Veldehytta er alltid er open - her kan du skriva deg inn i hytteboka og ta ny rast. Utanfor hytta er det sett opp fleire skilt til ulike turar. Turen til Longåsdalen går langs same stien som Arquebusmarsjen har frå Eikås i Bjoa. Dette er også Haugesund Turistforening sin gamle sti frå Bjoa. Stien er godt rydda og merka med merkepinnar til Husafjellet. Herifrå er det malt raude merke på steinar og berg. Følg stien til Longåsdalshytta. Her er det bok å skriva seg inn i. Frå denne hytta går det traktorveg langs Longåsdalsvatnet heilt ned til Bjordal. I Bjordal har dei nytta vatnet i elva til småkraftverk og til eit gammalt restaurert sagbruk. Bjordalstunet er godt kjent for sine fine selskapslokale i dei gamle ombygde løebygningane. **Fottøy:** Gode tette fjellsko.

## Tur til Vikebygd.

**Lengde:** 10 km

**Tidsbruk:** 3,5 - 4 t

**Vanskegrad:** Blå tur – lang familietur.

**Terreng:** Traktorveg 3,5 km til Veldehytta – vidare til Vikestølen er det flatt og myrlendt.

Frå Vikestølshytta er det god traktorveg på 5 km heilt ned til Vikebygd.

**Opplysn.:** Info. om vegen til Vikestølshytta – sjå ”Tur til Vikestølen”

Vegen frå Vikestølshytta og ned til Vikebygd er god og lett å gå på, men har nokre bratte parti. Vegen svingar seg i fint terreng nedover liane forbi Longavatnet som er drikkevasskjelda til Vikebygd. I nedre enden av vatnet er det demning og her går det sti til høgre opp til Trodlafjellet. Eit godt stykke nedanfor Longavatnet går det ein sti til venstre opp til Morgonsvatnet.

I Vikebygd kjem du ned på hovudvegen like ovanfor kyrkja.

**Fottøy:** Gode og tette fjellsko.

## Tur til Ørnaberget (343 m o.h)

**Lengde:** 2,5 km

**Tidsbruk:** 1 t

**Vanskegrad:** Blå tur – fin familietur.

**Terreng:** Følg god traktorveg med nokre bratte parti opp til Dyrhaug. Stien vidare er

lett å gå – godt merka – nokre våte parti før du svingar opp til Ørnaberget.

**Opplysn.:** Traktorvegen frå parkeringsplassen er lett å gå sjølv om det kan vera nokre bratte parti. Om lag 800 m lenger oppe frå parkeingsplassen kan du ta av ved skilt ”Sti gjennom lerkeskog” – ein fin opplevelse å gå på mjuk skogsbotn av barnåler.

Du kjem inn på same traktorvegen litt lenger opp etter denne fine avstikkaren.

Det er noko spesielt å gå gjennom ein slik tett lerkeskog både for vaksne og barn.

Vegen vidare oppover svingar seg gjennom granskog og bjørkeskog – fredeleg.

På Dyrhaug bør du ta ein liten avstikkar til høgre – sjå skilt - gå gjennom grinda opp på rasteplassen like ovanfor hytta – berre 100 m.

Her bør du ta ein pause på rasteplassen og nyta utsikta.

Ved Dyrhaug går fellessti vidare til Ørnaberget og Stemmetjørna.

Stien er godt merka med merkepinnar og er lett å gå på – nokre våte parti.

Oppe på Ørnaberget er det flott utsikt over Vatsbygda og innover til Ølen.

Her ser du også ned til Stemmetjørna – lett å gå ned til dette fine fjellvatnet.

Frå Ørnaberget kan du nå gå nedatt same vegen som du gjekk opp, eller du kan gå

nedatt til E 134 ved Tjelmarmyra ved å følga skilta sti nedover liane i eit meir

kupert terreng. Nede ved Tjelmarmyra er det ikkje lange vegen opp til

parkeringsplassen der du har bilen ståande.

Følg skilta og merkepinnane nedover. Fin rundtur.

**Fottøy:** Gode tette sko..

## Tur til Stemmetjørna (301 m o.h.)

**Lengde:** 2,5 km

**Tidsbruk:** 1 t

**Vanskegrad:** Blå tur – fin familietur

**Terreng:** Følg god traktorveg gjennom granskog –her er nokre bratte parti opp til Dyrhaug. Stien vidare frå Dyrhaug er godt merka og skilta og lett å gå, men har nokre våte myrlendte strekningar.

**Opplysn.:** Traktorvegen opp til Dyrhaug er fin å gå på, men har nokre bratte parti. Om lag 800 m opp frå parkeringsplassen står det eit skilt ”**Sti gjennom lerkeskog**” - stien kjem ut på same traktorvegen lenger oppe. Dette er meint som ein ”**opplevelses-tur**” for store og små. Det er litt spesielt å gå inn i ein slik tett skog - noko trolsk. Oppe ved Dyrhaug bør du ta avstikkar til høgre ved skilta **Dyrhaug** og **Rasteplass** - gå gjennom grinda og forbi ei hytte som ligg der. Berre 100 m å gå. Ovanfor hytta ligg sjølve Dyrhaug med ein flott utsikt over Vatsbygda og fjella. Her ligg eit stor steinbord du kan rasta og ta ein pause om du vil. Stien vidare inn til Stemmetjørna er godt skilta – same veg som til Ørnaberget. Vel framme ved Stemmetjørna er det tid for ein rast og nyta roen og freden ved dette fine fjellvatnet og kanskje få du sjå fisken vaka. Dersom du ikkje vil gå tilbake same vegen, kan du herifrå gå nedatt til **E – 134 ved Tjelmarmyra** . Tjelmarmyra ligg om lag 400 m nord for Eikesdalsvegen. Då er ikkje vegen lang opp til parkeringsplassen om du har bilen ståande der. Følg skilta og merkepinnane.  
**Fottøy:** Gode tette sko.

## Tur til Eikås/Bjoa.

**Lengde:** 8 km

**Tidsbruk:** 3,5 – 4 t

**Vanskegrad:** Blå tur – lang familietur.

**Terreng:** Traktorveg 3,5 km til Veldehytta. Vidare flatt og myrlendt til Vikestølen. Frå Vikestølen til Eikås går det ein 3 km lang skogsveg - nokså flatt. Frå Eikås går det bilveg ned til Innbjoa.

**Opplysningar:** Om vegen til Vikestølen – **sjå info om turen ”Tur til Vikestølen”**. Arquebusmarsjen går frå Eikås til Veldehytta og vidare til Longåsdalen og ned til Bjordal. Dette er ein minnemarsj om **motstandsmannen Sverre K. Andersen under dekknamnet Arquebus** som spela ein truskuldig dreng hos Martin Eikås under heile 2. verdskrigen. Denne marsjen går kvart år fyrste søndag etter 17. mai. Ein flott tur som endar i Bjordal med middag og film om Arquebus og utdeling av turmerke. Nå går du motsett veg frå Veldehytta og til Eikås. I Vikestølshytta må du ta ein rast etter tung marsj i myrane innover. Hytta er open – inne ligg det ei hyttebok på bordet som du kan skriva deg inn i. Herifrå går det traktorveg fram til Eikås og så bilveg ned til Innbjoa.  
**Fottøy:** Gode tette sko.

## **Tur til Moldebrekka (619 m o. h.)**

**Lengde:** 5 km

**Tidsbruk:** 2 – 2,5 t

**Vanskegrad:** Blå tur – litt hard familietur.

**Terreng:** God traktorveg på 3,5 km til Veldehytta. Derifrå på ein sti på skrå oppover mot Samuelsen – litt myrlendt og deretter fastare sti opp til toppen.

**Opplysningar.** Om vegen til Veldehytta – **sjå info om ”Tur til Veldehytta”**.

Ved Veldehytta står det mange skilt til ulike turar. Følg den merka og rydda stien mot Longåsdalen på skrå opp til toppen av åskammen – her står det skilt til Samuelsen og Moldebrekka. Gå til Samuelsen og vidare nordover og oppover til Moldebrekka. Fint fjelldrag med god utsikt. Flott vinterstid. Er du heldig vil du om sommaren sjå og høyra heiloen med sin fascinerande klagesong. Ravnene er også vanleg å sjå og høyra her.

**Fottøy:** Gode tette fjellsko.